

Na osnovu članova 5. i 29. Zakona o Vladi Tuzlanskog kantona ("Službene novine Tuzlanskog kantona, broj: 17/00, 1/05 i 11/06), a u vezi sa članovima 10. i 83. Zakona o unutrašnjim poslovima Tuzlanskog kantona ("Službene novine Tuzlanskog kantona", broj 4/10), Vlada Tuzlanskog kantona, na sjednici održanoj dana 27.04.2011 godine, donosi

U R E D B U
O OSIGURANJU ODREĐENIH LIČNOSTI I
OBJEKATA U TUZLANSKOM KANTONU

Član 1.
(Predmet Uredbe)

Ovom Uredbom određuju se ličnosti i objekti u Tuzlanskom kantonu (u daljem tekstu: Kanton), koje se posebno osiguravaju i uređuje način njihovog osiguranja, kao i druga pitanja od značaja za osiguranje ličnosti i objekata.

Član 2.
(Ličnosti koje se osiguravaju)

Ličnosti Kantona koje se posebno osiguravaju su:

- a) predsjednik Skupštine Tuzlanskog kantona,
- b) premijer Tuzlanskog kantona,

Član 3.
(Objekti koji se osiguravaju)

Posebno se osiguravaju objekti u kojima su smješteni:

- a) Skupština Tuzlanskog kantona, (u daljem tekstu Skupština Kantona)
- b) Vlada Tuzlanskog kantona (u daljnjem tekstu: Vlada Kantona)

Član 4.
(Ostale ličnosti i objekti u Kantonu koje se osiguravaju)

- (1) Izuzetno, kada sigurnosne okolnosti to zahtijevaju, ministar Ministarstva unutrašnjih poslova (u daljem tekstu: ministar), u saradnji sa policijskim komesarom, može odlučiti da se određeno vrijeme osiguravaju i druge ličnosti i objekti na kantonalnom i općinskom nivou.
- (2) Mjere osiguranja ličnosti i objekata iz prethodnog stava ovog člana, mogu se u početnom stadiju odrediti do 30 dana i iste će se produžiti pod uslovom da nisu prestali sigurnosni razlozi koji su doveli do njihovog određivanja.

Član 5.
(Organ koji vrši osiguranje)

Poslove posebnog osiguranja ličnosti i objekata iz čl. 2. i 3. i 4. ove Uredbe, vrši Ministarstvo unutrašnjih poslova Tuzlanskog kantona (u daljem tekstu Ministarstvo).

Član 6.
(Način osiguranja objekata)

Osiguranje objekata iz člana 3. ove Uredbe vrši se neposrednom fizičkom zaštitom, u formi redovnog osiguranja, u vremenu od 07,00 do 17,00 sati i kroz pojačanu patrolnu djelatnost tokom 24 sata.

Član 7.
(Način osiguranja ličnosti)

- (1) Osiguranje ličnosti iz člana 2. ove Uredbe podrazumijeva osiguranje objekata u mjestu stanovanja, i to putem patrolne djelatnosti koja podrazumijeva povremeni obilazak tokom 24 sata.
- (2) Kada to sigurnosni razlozi zahtijevaju, osiguranje ličnosti može se vršiti u formi redovnog i pojačanog osiguranja kako u mjestu stanovanja, tako i na radnom mjestu, i u pokretu.

Član 8.
(Plan osiguranja)

- (1) Konkretno mjere i aktivnosti oko organizovanja i načina sprovođenja osiguranja ličnosti i objekata, te mjere, radnje, snage i sredstva, utvrđuju se posebnim Planom osiguranja, kojeg donosi policijski komesar.
- (2) O načinu osiguranja i sačinjavanju posebnog Plana osiguranja konsultovat će se i osiguravana ličnost.

Član 9.
(Poštivanje mjera osiguranja)

- (1) Ličnosti koje se posebno osiguravaju dužne su poštovati i pridržavati se predviđenih mjera i načina osiguranja.
- (2) U slučaju nepridržavanja predviđenih mjera i načina osiguranja, štićena ličnost je obavezna o razlozima nepoštivanja i nepridržavanja predviđenih mjera i načina osiguranja pismeno ili usmeno obavijestiti Vladu Kantona i ministra.

Član 10.
(Pomoć policije u saobraćaju)

Policijski službenici, prilikom obavljanja svojih redovnih poslova, dužni su poslanicima Skupštine Kantona i članovima Vlade Kantona, pružiti potrebnu pomoć u saobraćaju, i na drugim mjestima gdje se za to ukaže potreba.

Član 11.
(Osiguranje delegacija i ličnosti)

Ministarstvo može, kada to interesi sigurnosti zahtijevaju, izvršiti osiguranje delegacija i ličnosti koje borave u posjeti Kantonu i na poziv državnih, federalnih i kantonalnih organa vlasti.

Član 12.
(Koordinacija unutar organizacionih jedinica Ministarstva)

Ministarstvo unutrašnjih poslova Tuzlanskog kantona će obezbijediti da organizacione jedinice koje učestvuju u osiguranju ličnosti i objekata međusobno sarađuju, usklađuju mjere i radnje i razmjenjuju informacije od značaja za njihovu sigurnost.

Član 13.
(Finansijska sredstva)

Finansijska sredstva za financiranje poslova posebnog osiguranja objekata i ličnosti iz ove Uredbe, osiguravaju se iz Budžeta Kantona.

Član 14.
(Prestanak važenja ranije odluke)

Stupanjem na snagu ove Uredbe, stavlja se van snage Odluka o određivanju ličnosti i zgrada Tuzlanskog kantona koje se posebno osiguravaju i način njihovog osiguranja („Službene novine Tuzlanskog kantona“, broj: 6/01)“

Član 15.
(Stupanje na snagu)

Ova Uredba stupa na snagu danom donošenja i objavit će se u „Službenim novinama Tuzlanskog kantona“.

Bosna i Hercegovina
Federacija Bosne i Hercegovine
TUZLANSKI KANTON
V L A D A

PREMIJER KANTONA

Sead Čaušević

Broj:02/1-04-008927/11
Tuzla,27.04.2011 godine